

दिनांक : 04.02.2026

समय : 18.45 बजे

आकाशवाणी जयपुर-अजमेर

प्रादेशिक समाचार

- मुख्यमंत्री भजनलाल शर्मा कह्यो-भारत अर अमेरिका बीचे व्ह्या कारोबारी करार ऊं राजस्थान री बरकत रा नुवा गेला खुलेला।
- प्रदेश मांय काल ग्राम उत्थान शिविरां रो दूजो दौर सरु व्हेला- पहला दौर मांय 77 लाख ऊं बत्ता लोगां ने फायदो मिल्यो।
- राज्य सरकार जोधपुर, पाली-मारवाड़ अर कंकाणी औद्योगिक हलकां ने प्रायोरिटी सेमीकंडक्टर कॉरिडोर रा तौर ऊं विकसित करेला।
- जयपुर मांय काल इंडिया स्टोनमार्ट 2026 सरु व्हेला- 500 ऊं बत्ती दुकानां माथे भाटा, मशीनां अर दूजा सामान रो दरसाव कर्यो जावेला।

मुख्यमंत्री भजनलाल शर्मा भारत अर अमेरिका बीचे व्ह्या कारोबारी करार ने ऐतिहासिक बतायो है। वे आज एक संदेश जारी कर र कह्यो के ओ करार देश रो भलो करण अर खास तौर ऊं राजस्थान सारु बरकत रा नुवा गेला खोलण वाळो है। संदेश मांय मुख्यमंत्री कह्यो के अमेरिका भारत ऊं जावण वाळा सामान माथे टैरिफ 50 फीसदी ऊं घटा र 18 फीसदी कर दीनो है, जिण ऊं भारत ऊं अमेरिका मांय माल बेचण वाळां ने घणी साता मिलेला। वे कह्यो के भारत अर अमेरिका बीचे व्ह्या ऐतिहासिक करार ऊं प्रदेश रा गहणां, हाथ री कारीगरी ऊं बण्या सामान, कपड़ा-लत्ता अर भाटा रा कारोबारियां सारु दिसावर मांय माल बेचण मांय बधोतरी व्हेला।

प्रदेश मांय काल ग्राम उत्थान शिविरां रो दूजो दौर सरु व्हेला। 9 फरवरी ताई चालण वाळा अ शिविर हर गिरदावर सर्किल माथे संवारे 10 ऊं सिंज्या 5 बज्यां ताई लगाया जावेला। मुख्यमंत्री भजनलाल शर्मा गांव वाळा ऊं आं शिविरां रो पूरो फायदो लेवण री अरज कीनी है। शिविरा मांय 13 महकमा री सेवा एक ई छत हेटे मिल रही है। हाल ताई लगायी ज्या शिविरां मांय 77 लाख ऊं बत्ती समस्यावां सुलझायी ज्यी। किसानां ने मृदा स्वास्थ्य कार्ड अर स्वामित्व कार्ड बांट्या जा रह्या है। ई सागे ई ढांढा-ढोरां रे टीका लगावण रो सुबीतो ई मुहैया करायो जा रह्यो है।

केंद्रीय संस्कृति अर पर्यटन मंत्री गजेन्द्र सिंह शेखावत कह्यो है के संसद मांय पेश करी ज्यो आम बजट-2026 केवल आमदनी खर्च रो ब्यौरो नी है, बल्कि साल 2047 ताई भारत ने विकसित देश बणावण री कार्ययोजना है। वे आज जोधपुर मांय राख्यी ज्या 'बजट युवा सम्मेलन' मांय बोल रह्या हा। शेखावत कह्यो के प्रधानमंत्री नरेंद्र मोदी री अगुवाई मांय बजट अब चुनावी ऐलाण रे बजाय देश बणावण रो जरियो बण ग्यो है। वे नौजवानां ऊं उद्यमिता अर नवाचार अपनावण री अरज करता थकां कह्यो के स्टार्टअप अर डिजिटल शिक्षा ऊं देश री तस्वीर बदल रही है।

प्रधानमंत्री नरेंद्र मोदी रा 6 फरवरी ने प्रसारित कर्या जावण वाळा 'परीक्षा पे चर्चा' कार्यक्रम रा बारा मांय पाली जिला रा विद्यार्थियां मांय घणो उमाव निजर आ रह्यो है। जिला री सरकारी अर गैर-सरकारी स्कूलां मांय ओ कार्यक्रम देखण सारु जरूरी तैयारियां करी जा रही है। वठे 12वीं कक्षा री छात्रा कलश बतायो के वां री स्कूल मांय सगळा विद्यार्थी मिल

र ओ कार्यक्रम देखेला। वा कह्यो के प्रधानमंत्री कानी ऊं दिया जावण वाळा सुझावां ऊं वां ने परीक्षा देवण ऊं जुड्या नुवा तरीका सीखण ने मिलेला अर वां रो खुद माथे भरोसो बधेला।

प्रधानमंत्री मातृ वन्दना योजना री राष्ट्रीय मासिक रैंकिंग मांय राजस्थान ओजू अव्वल रह्यो है। जनवरी 2026 री रैंकिंग मांय राजस्थान पाछे कर्नाटक दूजा अर असम तीजा पायदान माथे रह्या। उपमुख्यमंत्री अर महिला अर बाल विकास मंत्री दिया कुमारी ई उपलब्धि सारु अहलकारां ने बधाई दीनी है। प्रधानमंत्री मातृ वन्दना योजना रा तैत पहला बच्चा रा जन्म री बगत पात्र महिलावां ने पांच हजार रुपया री मदद दी जावे है, जदके 1 अप्रैल 2022 पाछे दूजी संतान टाबरी व्हेवण री सूरत मांय छह हजार रुपया देवण रो प्रावधान है।

राज्य सरकार जोधपुर-पाली-मारवाड़ अर कंकाणी औद्योगिक हलकां रे प्रायोरिटी सेमीकंडक्टर कॉरिडोर व्हेवण रो ऐलाण करण रो फ़ैसलो कीनो है। ई सारु नुवी राजस्थान सेमीकंडक्टर पॉलिसी बणायी ज्यी है। सेमीकंडक्टर इकाइयां लगावण री मंशा राखण वाळां ने राजनिवेश पोर्टल रे ज़रिए अर्जी देवणी व्हेला। नीति री निगराणी सारु स्टेट एम्पॉवर्ड कमेटी अर स्टेट लेवल सेंक्शनिंग कमेटी बणायी जावेला। निवेशकां ने तेज़ी ऊं जमीं रा आवंटन सागे बिजली-पाणी रा सुबीता मुहैया करावण माथे खास ध्यान दियो जावेला।

जयपुर मांय काल इंडिया स्टोनमार्ट 2026 सरु व्हेला। 8 फरवरी तांई चालण वाळी ई प्रदर्शनी मांय 500 ऊं बत्ती दुकानां रे ज़रिए भाटा, मशीनां अर नुवा सामान रो दरसाव कर्यो जावेला। प्रदर्शनी मांय जयपुर आर्किटेक्चर फेस्टिवल, डिजाइन होड़ां अर ग्लोबल स्टोन टेक्नोलॉजी फोरम माथे सगळां रो ध्यान व्हेला।

विश्व कैंसर दिवस रे मौके आज आखा राज्य मांय ई बीमारी रा बारा मांय जाग जगावण सारु भांत-भांत रा कार्यक्रम राख्यी ज्यो। जैसलमेर मांय रैली निकाळ र कैंसर री रोकथाम अर टेमसर ईलाज करण रो संदेश दियो ज्यो। दौसा मांय राख्यी ज्यो कार्यक्रम मांय डॉक्टर ई बीमारी रा लक्षणां अर जांच रा बारा मांय जाणकारी दीनी। ई दौरान डॉ. ज्योति मीणा समाज ने कैंसर री बीमारी ऊं सावचेत रेहवण बाबत् कह्यो।

महिलावां रा सीना मांय कैंसर री बीमारी रा बारा मांय जोधपुर एम्स मांय सर्जिकल ओंकोलॉजी विभाग रा विभाग अध्यक्ष डॉ. जीवन विश्नोई बतायो के टेमसर जांच अर ईलाज ऊं पहली स्टेज रा ब्रेस्ट कैंसर री पिछाण व्हेवण परां मरीज़ रे ठीक व्हेवण री संभावना 97 ऊं 100 फीसदी तांई व्हे जावे है। वे बतायो के पैली आ बीमारी मोटा शहरां तांई ई ही पण अब आतूणी राजस्थान मांय ई कैंसर रा मामला सामी आवण लाग्या है।

पाली जिला रा बाली, साण्डेराव अर जवाई बांध समेत केई हलकां मांय सिंयाळू साखां मांय कीड़ा लागण अर बीमारियां व्हेवण रा मामला सामी आया है। कृषि विभाग री जांच टीम रा दौरा पाछे सरसों, गेहूं, चणा, अरंडी अर मसालां री साखां मांय खराबी री जाणकारी मिली है। कृषि उपनिदेशक डॉ. खुमान सिंह ई रा असर वाळा हलकां मांय किसानां ने साखां बचावण सारु जरूरी दवाइयां काम लेवण बाबत् कह्यो है। वे चणा री साखां ने बचावण सारु इमामेक्टीन बेंजोइट, तारामीरा सारु इमिडाक्लोपिड अर गेहूं री साख सारु टेबुकोनाजोल काम लेवण री राय दीनी है। सरसों मांय मोयलो लाग जावण री समस्या ने ध्यान राखता थकां वे पाक रही साख माथे छिड़काव नी करण री राय दीनी है।

झुंझुनू मांय कलेक्टर रा दफ्तर मांय बेगी ई मोटा अनाज ऊं बणी खाण-पीण री चीजां री दुकान सरु करी जावेला। आ दुकान महिला अधिकारिता विभाग अर राजीविका ऊं जुड़ी

सिखावण लियोडी महिलावां चलावेला। ऐडी एक महिला ममता बतायो के ई दुकान मांय श्रीअन्न ऊं बणी खाण—पीण री चीजां मिलेला।

.....
अमृत भारत स्टेशन योजना रा तैत राज्य रा 12 टेशन विकसित कर्या जा रह्या है। रेल मंत्री अश्विनी वैष्णव आज लोकसभा मांय आ जाणकारी दीनी। वे बतायो के ई साल रेल बजट मांय राजस्थान सारु 9 हजार 960 करोड़ रुपया राख्यी ज्या है। वे बतायो के जैसलमेर, बाड़मेर अर भीलड़ी बीच 380 किलोमीटर लंबी नुवी रेलवे लेण रा सर्वे री मंजूरी दे दीरीजी है। मंत्री बतायो के जोधपुर—बाड़मेर बीच रेलवे लेण ने दोवड़ी बणावण रो काम ई सुरू व्हे ग्यो है। रेल मंत्री बतायो के मौजूदा दौर मांय बांदीकुई ऊं रोजीना 80 अर दौसा ऊं 72 रेलगाड़ियां आ—जा रही है। वे कह्यो के दिल्ली—जयपुर बीच ई केई नुवी गाड़ियां चलायी जा रही है।

उत्तर पश्चिम रेलवे रो जोधपुर मंडल चालू माली साल रा हाल ताई रा दस महीना मांय 9 करोड़ 77 लाख रुपया री आमदनी हासिल कीनी है, जो लक्ष्य ऊं करीब 6 फीसदी बत्ती है। जनवरी 2026 ताई टिकट जांच रा 2 लाख 26 हजार ऊं बत्ता मामला मांय मेड़ता, डेगाना, जैसलमेर अर बाड़मेर रेलखण्डां मांय कार्रवाई करी ज्यी। जनवरी महीना मांय 89 लाख रुपया ऊं बत्तो जुर्मानो वसूल करी ज्यो।